

अष्टपाहुड गाथा

दर्शनपाहुड

काऊण णमुक्कारं जिणवरवसहस्स वड्ढमाणस्स ।
दंसणमगं वोच्छामि जहाकम्मं समासेण ॥१॥
दंसणमूलो धम्मो उवड्ढो जिणवरेहिं सिस्साणं ।
तं सोऊण सकण्णे दंसणहीणो ण वंदिव्वो ॥२॥
दंसणभट्ठा भट्ठा दंसणभट्ठस्स णत्थि णिव्वाणं ।
सिज्झंति चरियभट्ठा दंसणभट्ठा ण सिज्झंति ॥३॥
सम्मत्तरयणभट्ठा जाणंता बहुविहाइं सत्थाइं ।
आराहणाविरहिया भमंति तत्थेव तत्थेव ॥४॥
सम्मत्तविरहिया णं सुट्ठू वि उगं तवं चरंता णं ।
ण लहंति बोहिलाहं अवि वाससहस्सकोडीहिं ॥५॥
सम्मत्तणाणदंसणबलवीरियवड्ढमाण जे सव्वे ।
कलिकलुसपावरहिया वरणाणी होंति अइरेण ॥६॥
सम्मत्तसलिलपवहो णिच्चं हियए पवट्ठए जस्स ।
कम्मं वालुयवरणं बन्धुच्चिय णासए तस्स ॥७॥
जे दंसणेसु भट्ठा णाणे भट्ठा चरित्तभट्ठा य ।
एदे भट्ठ वि भट्ठा सेसं पि जणं विणासंति ॥८॥
जो कोवि धम्मसीलो संजमतवणियमजोगुणधारी ।
तस्स य दोस कहंता भग्गा भग्गतणं दिति ॥९॥
जह मूलम्मि विणट्ठे दुमस्स परिवार णत्थि परवड्ढी ।
तह जिणदंसणभट्ठा मूलविणट्ठा ण सिज्झंति ॥१०॥
जह मूलाओ खंधो साहापरिवार बहुगुणो होइ ।
तह जिणदंसण मूलो णिदिट्ठो मोक्खमग्गस्स ॥११॥
जे दंसणेसु भट्ठा पाए पाडंति दंसणधराणं ।
ते होंति लल्लमूआ बोही पुण दुल्लहा तेसिं ॥१२॥

जे वि पडंति य तेसिं जाणंता लज्जागारवभयेण ।
 तेसिं पि णत्थि बोही पावं अणुमोयमाणानं ॥१३॥
 दुविंह पि गंथचायं तीसु वि जोएसु संजमो ठादि ।
 णाणम्मि करणसुद्धे उब्भसणे दंसणं होदि ॥१४॥
 सम्मत्तादो णाणं णाणादो सव्वभावउवलद्धी ।
 उवलद्धपयत्थे पुण सेयासेयं वियाणेदि ॥१५॥
 सेयासेयविदण्हू उद्धुददुस्सील सीलवंतो वि ।
 सीलफलेणब्भुदयं तत्तो पुण लहइ णिव्वाणं ॥१६॥
 जिणवयणमोसहमिणं विसयसुहविरेयणं अमिदभूदं ।
 जरमरणवाहिहरणं खयकरणं सव्वदुक्खाणं ॥१७॥
 एगं जिणस्स रूवं बिदियं उक्किट्ठसावयाणं तु ।
 अवरट्ठियाण तइयं चउत्थ पुण लिंगदंसणं णत्थि ॥१८॥
 छह दव्व णव पयत्था पंचत्थी सत्त तच्च णिद्धि ।
 सदहइ ताण रूवं सो सद्धिटी मुणेयव्वो ॥१९॥
 जीवादीसद्धहणं सम्मत्तं जिणवरेहिं पण्णत्तं ।
 ववहारा णिच्छयदो अप्पाणं हवइ सम्मत्तं ॥२०॥
 एवं जिणपण्णत्तं दंसणरयणं धरेह भावेण ।
 सारं गुणरयणत्तय सोवाणं पढम मोक्खस्स ॥२१॥
 जं सक्कइ तं कीरइ जं च ण सक्केइ तं च सदहणं ।
 केवलजिणेहिं भणियं सदमाणस्स सम्मत्तं ॥२२॥
 दंसणणाणचरित्ते तवविणये णिच्चकालसुपसत्था ।
 एदे दु वंदणीया जे गुणवादी गुणधराणं ॥२३॥
 सहजुप्पण्णं रूवं दट्ठं जो मण्णए ण मच्छरिओ ।
 सो संजमपडिवण्णो मिच्छाइट्ठी हवइ एसो ॥२४॥
 अमराण वंदियाणं रूवं दट्ठूण सीलसहियाणं ।
 जे गारवं करंति य सम्मत्तविवज्जिया होंति ॥२५॥
 अस्संजदं ण वन्दे वत्थविहीणोवि तो ण वंदिज्ज ।
 दोण्णि वि होंति समाणा एगो वि ण संजदो होदि ॥२६॥

ण वि देहो वंदिज्जइ ण वि य कुलो ण वि य जाइसंजुतो ।
 को वंदमि गुणहीणो ण हु सवणो णेय सावओ होइ ॥२७॥
 वंदमि तवसावण्णा सीलं च गुणं च बंभचेरं च ।
 सिद्धिगमणं च तेसिं सम्मत्तेण सुद्धभावेण ॥२८॥
 चउसट्ठि चमरसहिओ चउतीसहि अइसएहिं संजुतो ।
 अणवरबहुसत्तहिओ कम्मक्खयकारणणिमित्तो ॥२९॥
 णाणेण दंसणेण य तवेण चरियेण संजमगुणेण ।
 चउहिं पि समाजोगे मोक्खो जिणसासणे दिट्ठो ॥३०॥
 णाणं णरस्स सारो सारो वि णरस्स होइ सम्मत्तं ।
 सम्मत्ताओ चरणं चरणाओ होइ णिव्वाणं ॥३१॥
 णाणम्मि दंसणम्मि य तवेण चरिण सम्मसहिण्ण ।
 चउण्हं पि समाजोगे सिद्धा जीवा ण सन्देहो ॥३२॥
 कल्लाणपरंपरया लहंति जीवा विसुद्धसम्मत्तं ।
 सम्मदंसणरयणं अग्घेदि सुरासुरे लोए ॥३३॥
 लद्धूण य मणुयत्तं सहियं तह उत्तमेण गोत्तेण ।
 लद्धूण य सम्मत्तं अक्खयसोक्खं च मोक्खं च ॥३४॥
 विहरदि जाव जिणिंदो सहसट्ठसुलक्खणेहिं संजुतो ।
 चउतीसअइसयजुदो सा पडिमा थावरा भणिया ॥३५॥
 बारसविहतवजुत्ता कम्मं खविऊण विहिबलेण सं ।
 वोसट्ठचत्तदेहा णिव्वाणमणुत्तरं पत्ता ॥३६॥

सूत्रपाहुड

अरहंतभासियत्थं गणहरदेवेहिं गंथियं सम्मं ।
 सुत्तत्थमगणत्थं सवणा साहंति परमत्थं ॥१॥
 सुत्तम्मि जं सुदिट्ठं आइरियपरंपूरेण मग्गेण ।
 णाऊण दुविह सुत्तं वट्ठदि सिवमग्ग जो भव्वो ॥२॥
 सुत्तं हि जाणमाणो भवस्स भवणासणं च सो कुणदि ।
 सूई जहा असुत्ता णासदि सुत्तेण सहा णो वि ॥३॥

पुरिसो वि जो ससुत्तो ण विणांसइ सो गओ वि संसारे ।
 सच्चेदण पच्चक्खं णासदि तं सो अदिस्समाणो वि ॥४॥
 सुत्तत्थं जिणभणियं जीवाजीवादिबहुविहं अत्थं ।
 हेयाहेयं च तहा जो जाणइ सो हु सद्दिट्ठी ॥५॥
 जं सुत्तं जिणउत्तं ववहारो तह य जाण परमत्थो ।
 तं जाणिऊण जोई लहइ सुहं खवइ मलपुंजं ॥६॥
 सुत्तत्थपयविणट्ठो मिच्छादिट्ठी हु सो मुणेयव्वो ।
 खेडे वि ण कायव्वं पाणिप्पत्तं सचेलस्स ॥७॥
 हरिहरतुल्लो वि णरो सगं गच्छेइ एइ भवकोडी ।
 तह वि ण पावइ सिद्धिं संसारत्थो पुणो भणिदो ॥८॥
 उक्किट्ठसीहचरियं बहुपरियम्मो य गरुयभारो य ।
 जो विहरइ सच्छंदं पावं गच्छदि होदि मिच्छतं ॥९॥
 णिच्चेलपाणिपत्तं उवइट्ठं परमजिणवरिंदेहिं ।
 एक्को वि मोक्खमग्गो सेसा य अमग्गया सव्वे ॥१०॥
 जो संजमेसु सहिओ आरंभपरिग्गहेसु विरओ वि ।
 सो होइ वंदणीओ ससुरासुरमाणुसे लोए ॥११॥
 जे बावीसपरीसह सहंति सत्तीसएहिं संजुत्ता ।
 ते होंति वंदणीया कम्मक्खयणिज्जरासाहू ॥१२॥
 अवसेसा जे लिंगी दंसणणाणेण सम्म संजुत्ता ।
 चेलेण य परिगहिया ते भणिया इच्छणिज्जा य ॥१३॥
 इच्छायारमहत्थं सुत्तठिओ जो हु छंडए कम्मं ।
 ठाणे द्वियसम्मत्तं परलोयसुहंकरो होदि ॥१४॥
 अह पुण अप्पा णिच्छदि धम्माइं करेइ णिरवसेसाइं ।
 तह वि ण पावदि सिद्धिं संसारत्थो पुणो भणिदो ॥१५॥
 एण कारणेण य तं अप्पा सद्वहेह तिविहेण ।
 जेण य लहेह मोक्खं तं जाणिज्जह पयत्तेण ॥१६॥
 वालग्गकोडिमेत्तं परिगहगहणं ण होइ साहूणं ।
 भुंजेइ पाणिपत्ते दिण्णण्णं इक्कठाणम्मि ॥१७॥

जहजायखूवसरिसो तिलतुसमेत्तं ण गिहदि हत्थेसु ।
 जइ लेइ अप्पबहुयं तत्तो पुण णिग्गोदम् ॥१८॥
 जस्स परिग्गहगहणं अप्पं बहुयं च हवइ लिंगस्स ।
 सो गरहिउ जिणवयणे परिगहरहिओ णिरायारो ॥१९॥
 पंचमहव्वयजुत्तो तिहिं गुत्तिहिं जो स संजदो होई ।
 णिगंथमोक्खमग्गो सो होदि हु वंदणिज्जो य ॥२०॥
 दुइयं च उत्त लिंगं उक्किट्ठं अवरसावयाणं च ।
 भिक्खं भमेइ पत्ते समिदीभासेण मोणेण ॥२१॥
 लिंगं इत्थीण हवदि भुंजइ पिंड सुएयकालम्मि ।
 अज्जिय वि एक्कवत्था वत्थावरणेण भुंजेदि ॥२२॥
 णविसिज्झदिवत्थधरोजिणसासणेजइविहोइ तित्थयरो ।
 णग्गो विमोक्खमग्गो सेसा उम्मगया सव्वे ॥२३॥
 लिंगम्मि य इत्थीणं थणंतरे णाहिकक्खदेसेसु ।
 भणिओ सुहुमो काओ तासिं कह होइ पव्वज्जा ॥२४॥
 जइ दंसणेण सुद्धा उत्ता मग्गेण सावि संजुत्ता ।
 घोरं चरिय चरित्तं इत्थीसु ण पव्वया भणिया ॥२५॥
 चित्तासोहि ण तेसिं ढिल्लं भावं तहा सहावेण ।
 विज्जदि मासा तेसिं इत्थीसु ण संकया झाणा ॥२६॥
 गाहेण अप्पगाहा समुदसलिले सचेलअत्थेण ।
 इच्छा जाहु णियत्ता ताह णियत्ताइं सव्वदुक्खाइं ॥२७॥

चारित्रपाहुड

सव्वणहु सव्वदंसी णिम्मोहा वीयराय परमेट्ठी ।
 वंदित्तु तिजगवंदा अरहंता भव्वजीवेहिं ॥१॥
 णाणं दंसण सम्मं चारित्तं सोहिकारणं तेसिं ।
 मोक्खाराहणहेउं चारित्तं पाहुडं वोच्छे ॥२॥
 जं जाणइ तं णाणं जं पेच्छइ तं च दंसणं भणियं ।
 णाणस्स णिच्छियस्स य समवण्णा होइ चारित्तं ॥३॥

एए तिण्णि वि भावा हवंति जीवस्स अक्खयामेया ।
 तिण्हं पि सोहणत्थे जिणभणियं दुविहं चारित्तं ॥४॥
 जिणणाणदिट्ठिसुद्धं पढमं सम्मत्तचरणचारित्तं ।
 बिदियं संजमचरणं जिणणाणसदेसियं तं पि ॥५॥
 एवं चिय णाऊण य सव्वे मिच्छत्तदोस संकाइ ।
 परिहर सम्मत्तमला जिणभणिया तिविहजोएण ॥६॥
 णिस्संकि य णिक्कंखिय णिव्विदिगिंछा अमूढदिट्ठी य ।
 उवगूहण ठिदिकरणं वच्छल्ल पहावणा य ते अट्ठ ॥७॥
 तं चेव गुणविसुद्धं जिणसम्मत्तं सुमुखठाणाए ।
 जं चरइ णाणजुत्तं पढमं सम्मत्तचरणचारित्तं ॥८॥
 सम्मत्तचरणसुद्धा संजमचरणस्स जइ व सुपसिद्धा ।
 णाणी अमूढदिट्ठी अचिरे पावंति णिव्वाणं ॥९॥
 सम्मत्तचरणभट्ठा संजमचरणं चरंति जे वि णरा ।
 अण्णाणणाणमूढा तह वि ण पावंति णिव्वाणं ॥१०॥
 वच्छल्लं विणएण य अणुकंपाए सुदाणदच्छाए ।
 मग्गगुणसंसणाए अवगूहण रक्खणाए य ॥११॥
 एएहिं लक्खणेहिं य लक्खिज्जइ अज्जवेहिं भावेहिं ।
 जीवो आराहंतो जिणसम्मत्तं अमोहेण ॥१२॥
 उच्छाहभावणासंपसंसेवा कुदंसणे सद्धा ।
 अण्णाणमोहमग्गे कुव्वंतो जहदि जिणसम्मं ॥१३॥
 उच्छाहभावणासंपसंसेवा सुदंसणे सद्धा ।
 ण जहदि जिणसम्मत्तं कुव्वंतो णाणमग्गेण ॥१४॥
 अण्णाणं मिच्छत्तं वज्जह णाणे विसुद्धसम्मत्ते ।
 अह मोहं सारंभं परिहर धम्मे अहिंसाए ॥१५॥
 पव्वज्ज संगचाए पयट्ठ सुतवे सुसंजमे भावे ।
 होइ सुविसुद्धझाणं णिम्मोहे वीयरायत्ते ॥१६॥
 मिच्छादंसणमग्गे मलिणे अण्णाणमोहदोसेहिं ।
 वज्जंति मूढजीवा मिच्छत्ताबुद्धिउदएण ॥१७॥

सम्मदंसण पस्सदि जाणदि णाणेण दव्वपज्जाया ।
सम्मेण य सदहदि य परिहरदि चरित्तजे दोसे ॥१८॥
ए त्तिणि वि भावा हवन्ति जीवस्स मोहरहियस्स ।
णियगुणमाराहतो अचिरेण य कम्म परिहरइ ॥१९॥
संखिज्जमसंखिज्जगुणं च संसारिमेरुमत्ता णं ।
सम्मत्तमणुचरन्ता करेन्ति दुक्खक्खयं धीरा ॥२०॥
दुविहं संजमचरणं सायारं तह हवे णिरायारं ।
सायारं सगंथे परिग्गहा रहिय खलु णिरायारं ॥२१॥
दंसण वय सामाइय पोसह सचित्त रायभत्ते य ।
बंभारंभापरिग्गह अणुमण उद्दिट्ठ देसविरदो य ॥२२॥
पंचेव णुव्वयाइं गुणव्वयाइं हवन्ति तह त्तिणि ।
सिक्खावय चत्तारि य संजमचरणं च सायारं ॥२३॥
थूले तसकायवहे थूले मोषे अदत्तथूले य ।
परिहारो परमहिला परिग्गहारंभपरिमाणं ॥२४॥
दिसिविदि सिमाण पढमं अणत्थदंडस्स वज्जणं बिदियं ।
भोगोपभोगपरिमा इयमेव गुणव्वया त्तिणि ॥२५॥
सामाइयं च पढमं बिदियं च तहेव पोसहं भणियं ।
तइयं च अतिहिपुज्जं चउत्थ सल्लेहणा अंते ॥२६॥
एवं सावयधम्मं संजमचरणं उदेसियं सयलं ।
सुद्धं संजमचरणं जइधम्मं णिक्कलं वोच्छे ॥२७॥
पंचेंदियसंवरणं पंच वया पंचविंसकिरियासु ।
पंच समिदि तय गुत्ती संजमचरणं णिरायारं ॥२८॥
अमणुण्णे य मणुण्णे सजीवदव्वे अजीवदव्वे य ।
ण करेदि रायदोसे पंचेंदियसंवरो भणिओ ॥२९॥
हिंसाविरइ अहिंसा असच्चविरइ अदत्तविरइ य ।
तुरियं अबंभविरइ पंचम संगम्मि विरइ य ॥३०॥
साहंति जं महल्ला आयरियं जं महल्लपुव्वेहिं ।
जं च महल्लाणि तदो महव्वया इत्तहे याइं ॥३१॥

वयगुत्ती मणगुत्ती इरियासमिदी सुदाणणिकखेवो ।
 अवलोयभोयणाए अहिंसए भावणा होंति ॥३२॥
 कोहभयहासलोहा मोहा विवरीयभावणा चेव ।
 विदियस्स भावणाए ए पंचेव य तहा होंति ॥३३॥
 सुण्णायारणिवासो विमोचियावास जं परोधं च ।
 एसणसुद्धिसउत्तं साहम्मीसंविसंवादो ॥३४॥
 महिलालोयणपुव्वरइसरणसंसत्तवसहिविकहाहिं ।
 पुट्टियरसेहिं विरओ भावण पंचावि तुरियम्मि ॥३५॥
 अपरिग्गह समणुण्णेषु सद्दपरिसरसरूवगंधेषु ।
 रायद्दोसाईणं परिहारो भावणा होंति ॥३६॥
 इरिया भासा एसण जा सा आदाण चेव णिकखेवो ।
 संजमसोहिणिमित्तं खंति जिणा पंच समिदीओ ॥३७॥
 भव्वजणबोहणत्थं जिणमग्गे जिणवरेहि जह भणियं ।
 णाणं णाणसरूवं अप्पाणं तं वियाणेहि ॥३८॥
 जीवाजीवविभत्ती जो जाणइ सो हवेइ सण्णाणी ।
 रायादिदोसरहिओ जिणसासणे मोक्खमग्गोत्ति ॥३९॥
 दंसणणाणचरित्तं तिण्णि वि जाणेह परमसद्धाए ।
 जं जाणिऊण जोई अइरेण लहंति णिव्वाणं ॥४०॥
 पाऊण णाणसलिलं णिम्मलसुविशुद्धभावसंजुता ।
 होंति सिवालयवासी तिहुवणचूडामणी सिद्धा ॥४१॥
 णाणगुणेहिं विहीणा ण लहंते ते सुइच्छियं लाहं ।
 इय णाउं गुणदोसं तं सण्णाणं वियाणेहिं ॥४२॥
 चारित्तसमारूढो अप्पासु परं ण ईहए णाणी ।
 पावइ अइरेण सुहं अणोवमं जाण णिच्छयदो ॥४३॥
 एवं संखेवेण य भणियं णाणेण वीयराएण ।
 सम्मत्तसंजमासयदुण्हं पि उदेसियं चरणं ॥४४॥
 भावेह भावसुद्धं फुडु रइयं चरणपाहुणं चेव ।
 लहु चउगइ चइऊणं अइरेणऽपुणब्भवा होई ॥४५॥

बोधपाहुड

बहुसत्थअत्थजाणे संजमसम्मत्तसुद्धतवयरणे ।
वंदिता आयरिए कसायमलवज्जिदे सुद्धे ॥१॥
सयलजणबोहणत्थं जिणमग्गे जिणवरेहिं जह भणियं ।
वोच्छामि समासेण छक्कायसुहंकरं सुणहं ॥२॥
आयदणं चेदिहरं जिणपडिमा दंसणं च जिणबिंबं ।
भणियं सुवीयरायं जिणमुद्दा णाणमादत्थं ॥३॥
अरहंतेण सुदिट्ठं जं देवं तित्थमिह य अरहंतं ।
पावज्जगुणविसुद्धा इय णायव्वा जहाकमसो ॥४॥
मणवयणकायदव्वा आयत्ता जस्स इन्दिया विसया ।
आयदणं जिणमग्गे णिदिट्ठं संजयं रूवं ॥५॥
मयरायदोस मोहो कोहो लोहो य जस्स आयत्ता ।
पंचमहव्वयधारी आयदणं महरिसी भणियं ॥६॥
सिद्धं जस्स सदत्थं विसुद्धझाणस्स णाणजुत्तस्स ।
सिद्धायदणं सिद्धं मुणिवरवसहस्स मुणिदत्थं ॥७॥
बुद्धं जं बोहंतो अप्पाणं चेदयाइं अण्णं च ।
पंचमहव्वयसुद्धं णाणमयं जाण चेदिहरं ॥८॥
चेइयं बंधं मोक्खं दुक्खं सुक्खं च अप्पयं तस्स ।
चेइहरं जिणमग्गे छक्कायहियंकरं भणियं ॥९॥
सपरा जंगमदेहा दंसणणाणेण सुद्धचरणाणं ।
णिगंथवीयराया जिणमग्गे एरिसा पडिमा ॥१०॥
जं चरदि सुद्धचरणं जाणइ णिच्छेइ सुद्धसम्मत्तं ।
सा होई वंदणीया णिगंथा संजदा पडिमा ॥११॥
दंसण अणंतणाणं अणंतवीरिय अणंतसुक्खा य ।
सासयसुक्ख अदेहा मुक्का कम्मट्ठबंधेहिं ॥१२॥
णिरुवममचलमखोहा णिम्विविया जंगमेण रूवेण ।
सिद्धट्ठाणम्मि ठिया वोसरपडिमा धुवा सिद्धा ॥१३॥
दंसेइ मोक्खमग्गं सम्मत्तं संजमं सुधम्मं च ।
णिगंथं णाणमयं जिणमग्गे दंसणं भणियं ॥१४॥

जह फुल्लं गंधमयं भवति हु खीरं स घियमयं चावि ।
तह दंसणं हि सम्मं णाणमयं होइ रूवत्थं ॥१५॥
जिणबिंबं णाणमयं संजमसुद्धं सुवीयरायं च ।
जं देह दिक्खसिक्खा कम्मक्खयकारणे सुद्धा ॥१६॥
तस्स य करह पणामं सव्वं पुज्जं च विणय वच्छल्लं ।
जस्स य दंसण णाणं अत्थि धुवं चेयणाभावो ॥१७॥
तववयगुणेहिं सुद्धो जाणदि पिच्छेइ सुद्धसम्मत्तं ।
अरहन्तमुद्द एसा दायारी दिक्खसिक्खा य ॥१८॥
दढसंजममुद्दाए इन्दियमुद्दा कसायदिढमुद्दा ।
मुद्दा इह णाणाए जिणमुद्दा एरिसा भणिया ॥१९॥
संजमसंजुत्तस्स य सुझाणजोयस्स मोक्खमग्गस्स ।
णाणेण लहदि लक्खं तम्हा णाणं च णायव्वं ॥२०॥
जह णवि लहदि हु लक्खं रहिओ कंडस्स वेज्झयविहीणो ।
तह णवि लक्खदि लक्खं अण्णाणी मोक्खमग्गस्स ॥२१॥
णाणं पुरिस्स हवदि लहदि सुपुरिसो वि विणयसंजुत्तो ।
णाणेण लहदि लक्खं लक्खंतो मोक्खमग्गस्स ॥२२॥
मइधणुहं जस्स थिरं सुदगुण बाणा सुअत्थि रयणत्तं ।
परमत्थबद्धलक्खो णवि चुक्कदि मोक्खमग्गस्स ॥२३॥
सो देवो जो अत्थं धम्मं कामांशुदेइ णाणं च ।
सो दइ जस्स अत्थि हु अत्थो धम्मो य पवज्जा ॥२४॥
धम्मो दयाविसुद्धो पव्वज्जा सव्वसंगपरिचत्ता ।
देवो ववगयमोहो उदयकरो भव्वजीवाणं ॥२५॥
वयसम्मत्तविसुद्धे पंचेंदियसंजदे णिरावेक्खे ।
ण्हाएउ मुणी तित्थे, दिक्खासिक्खासुण्हाणेण ॥२६॥
जं णिम्मलं सुधम्मं सम्मत्तं संजमं तवं णाणं ।
तं तित्थं जिणमग्गे हवेइ जदि सतिभावेण ॥२७॥
णामे ठवणे हि संदव्वे भावे हि सगुणपज्जाया ।
चउणागदि संपदिमे भावा भावंति अरहंतं ॥२८॥

दंसण अणंत णाणे मोक्खो णट्ठकम्मबंधेण ।
 णिरुवमगुणमारूढो अरहंतो एरिसो होइ ॥२९॥
 जरवाहिजम्ममरणं चउगइगमणं च पुण्णपावं च ।
 हंतूण दोसकम्मे हुउ णाणमयं च अरहंतो ॥३०॥
 गुणठाणमग्गणेहिं य पज्जत्तीपाणजीवठाणेहिं ।
 ठावण पंचविहेहिं पणयव्वा अरहपुरिसस्स ॥३१॥
 तेरहमे गुणठाणे सजोइकेवलिय होइ अरहंतो ।
 चउतीस अइसयगुणा होंति हु तस्सट्ठ पडिहारा ॥३२॥
 गइ इंदियं च काए जोए वेए कसाय णाणे य ।
 संजम दंसण लेसा भविया सम्मत्त सण्णि आहारे ॥३३॥
 आहारो य सरीरो इंदियमणआणपाणभासा य ।
 पज्जत्तिगुणसमिद्धो उत्तमदेवो हवइ अरहो ॥३४॥
 पंच वि इंदियपाणा मणवयकाएण तिण्णि बलपाणा ।
 आणप्पाणप्पाणा आउगपाणेण होंति दह पाणा ॥३५॥
 मणुयभवे पंचिंदिय जीवट्ठाणेसु होइ चउदसमे ।
 एदे गुणगणजुत्तो गुणमारूढो हवइ अरहो ॥३६॥
 जरवाहिदुक्खरहियं आहारणिहारवज्जियं विमलं ।
 सिंहाण खेले सेओ णत्थि दुगुंछा य दोसो य ॥३७॥
 दस पाणा पज्जती अट्ठसहस्सा य लक्खणा भणिया ।
 गोखीरसंखधवलं मंसं रुहिरं च सव्वंगे ॥३८॥
 एरिसगुणेहिं सव्वं अइसयवंतं सुपरिमलामोयं ।
 ओरालियं च कायं णायव्वं अरहपुरिसस्स ॥३९॥
 मयरायदोसरहिओ कसायमलवज्जिओ य सुविशुद्धो ।
 चित्तपरिणामरहिदो केवलभावे मुणेयव्वो ॥४०॥
 सम्मदंसणि पस्सदि जाणदि णाणेण दव्वपज्जाया ।
 सम्मत्तगुणविशुद्धो भावो अरहस्स णायव्वो ॥४१॥
 सुण्णहरे तरुहिट्ठे उज्जाणे तह मसाणवासे वा ।
 गिरिगुह गिरिसिहरे वा भीमवणे अहव वसिते वा ॥४२॥

सवसासत्तं तित्थं वचचइदालत्तयं च वुत्तेहिं ।
 जिणभवणं अह बेज्झं जिणमग्गे जिणवरा विंति ॥४३॥
 पंचमहव्वयजुत्ता पंचिंदियसंजया णिरावेक्खा ।
 सज्झायझाणजुत्ता मुणिवरवसहा णिइच्छन्ति ॥४४॥
 गिहगंधमोहमुक्का बावीसपरीसहा जियकषाया ।
 पावारंभविमुक्का पव्वज्जा एरिसा भणिया ॥४५॥
 धणधणवत्थदाणं हिरण्णसयणासणाइ छत्ताइं ।
 कुदाणविरहरहिया पव्वज्जा एरिसा भणिया ॥४६॥
 सत्तूमित्ते य समा पसंसणिंदा अलब्धिलब्धिसमा ।
 तणकणए समभावा पव्वज्जा एरिसा भणिया ॥४७॥
 उत्तममज्झिमगेहे दारिहे ईसरे णिरावेक्खा ।
 सव्वत्थ गिहिदपिंडा पव्वज्जा एरिसा भणिया ॥४८॥
 णिगंधा णिस्संगा णिम्माणासा अराय णिद्दोसा ।
 णिम्मम णिरहंकारा पव्वज्जा एरिसा भणिया ॥४९॥
 णिण्णेहा णिल्लोहा णिम्मोहा णिव्वियार णिक्कलुसा ।
 णिब्भय णिरासभावा पव्वज्जा एरिसा भणिया ॥५०॥
 जहजायरूवसरिसा अवलंबियभुय णिराउहा संता ।
 परकियणिलयणिवासा पव्वज्जा एरिसा भणिया ॥५१॥
 उवसमखमदमजुत्ता सरीरसंकारवज्जिया रुक्खा ।
 मयरायदोसरहिया पव्वज्जा एरिसा भणिया ॥५२॥
 विवरीयमूढभावा पणट्ठकम्मट्ठ णट्ठमिच्छत्ता ।
 सम्मत्तगुणविसुद्धा पव्वज्जा एरिसा भणिया ॥५३॥
 जिणमग्गे पव्वज्जा छहसंहणणेसु भणिय णिगंधा ।
 भावंति भव्वपुरिसा कम्मक्खयकारणे भणिया ॥५४॥
 तिलतुसमत्तणिमित्तसम बाहिरगंधसंगहो णत्थि ।
 पव्वज्ज हवइ एसा जह भणिया सव्वदरसीहिं ॥५५॥
 उवसग्गपरिसहसहा णिज्जणदेसे हि णिच्च अत्थइ ।
 सिल कट्ठे भूमितले सव्वे आरुहइ सव्वत्थ ॥५६॥

पसुमहिलसंढसंगं कुसीलसंगं ण कुणइ विकहाओ ।
 सज्झायझाणजुत्ता पव्वज्जा एरिसा भणिया ॥५७॥
 तववयगुणेहिं सुद्धा संजमसम्मत्तगुणविसुद्धा य ।
 सुद्धा गुणेहिं सुद्धा पव्वज्जा एरिसा भणिया ॥५८॥
 एवं आयत्तणगुणपज्जंता बहुविसुद्धसम्मत्ते ।
 णिगंथे जिणमग्गे संखेवेणं जहाखादं ॥५९॥
 रूवत्थं सुद्धत्थं जिणमग्गे जिणवरेहिं जह भणियं ।
 भव्वजणबोहणत्थं छक्कायहियंकरं उत्तं ॥६०॥
 सद्वियारो हूओ भासासुत्तेसु जं जिणे कहियं ।
 सो तह कहियं णायं सीसेण य भद्दबाहुस्स ॥६१॥
 बारसअंगवियाणं चउदसपुव्वंगविउलवित्थरणं ।
 सुयणाणि भद्दबाहू गमयगुरू भयवओ जयउ ॥६२॥

भावपाहुड

णमिऊण जिणवरिंदे णरसुरभवणिंदवंदिए सिद्धे ।
 वोच्छामि भावपाहुडमवसेसे संजदे सिरसा ॥१॥
 भावो हि पढमलिंगं ण दव्वलिंगं च जाण परमत्थं ।
 भावो कारणभूदो गुणदोसाणं जिणा बेन्ति ॥२॥
 भावविसुद्धिणिमित्तं बाहिरगंथस्स कीरए चाओ ।
 बाहिरचाओ विहलो अब्भंतरगंथजुत्तस्स ॥३॥
 भावरहिओ ण सिज्झइ जइ वि तवं चरइ कोडिकोडीओ ।
 जम्मंतराइ बहुसो लंबियहत्थो गलियवत्थो ॥४॥
 परिणामम्मि असुद्धे गंथे मुज्जेइ बाहिरे य जई ।
 बाहिरगंथच्चाओ भावविहूणस्स किं कुणइ ॥५॥
 जाणहि भावं पढमं किं ते लिंगेण भावरहिण ।
 पंथिय सिवपुरिपंथं जिणउवइट्ठं पयत्तेण ॥६॥
 भावरहिण सपुरिस अणाइकालं अणंतसंसारं ।
 गहिउज्झियाइं बहुसो बाहिरणिगंथरूवाइं ॥७॥

भीसणणरयगईए तिरियगईए कुदेवमणुगइए ।
 पत्तो सि तिब्बदुक्खं भावहि जिणभावणा जीव ॥८॥
 सत्तसु णरयावासे दारुणभीमाइं असहणीयाइं ।
 भुत्ताइं सुइरकालं दुःक्खाइं णिरंतरं अहियं ॥९॥
 खणणुत्तावणवालणवेयणविच्छेयणाणिरोहं च ।
 पत्तो सि भावरहिओ तिरियगईए चिरं कालं ॥१०॥
 आगंतुक माणसियं सहजं सारीरियं च चत्तारि ।
 दुक्खाइं मणुयजम्मे पत्तो सि अणंतयं कालं ॥११॥
 सुरणिलयेसु सुरच्छरविओयकाले य माणसं तिब्बं ।
 संपत्तो सि महाजस दुःखं सुहभावणारहिओ ॥१२॥
 कंदप्पमाइयाओ पंच वि असुहादिभावणाई य ।
 भाऊण दव्वलिंगी पहीणदेवो दिवे जाओ ॥१३॥
 पासत्थभावणाओ अणाइकालं अणेयवाराओ ।
 भाऊण दुहं पत्तो कुभावणाभावबीएहिं ॥१४॥
 देवाण गुण विहूई इइढी माहप्प बहुविहं दट्ठुं ।
 होऊण हीणदेवो पत्तो बहु माणसं दुक्खं ॥१५॥
 चउविहविकहासत्तो मयमत्तो असुहभावपयडत्थो ।
 होऊण कुदेवत्तं पत्तो सि अणेयवाराओ ॥१६॥
 असुईबीहत्थेहि य कलिमलबहुलाहि गब्भवसहीहि ।
 वसिओ सि चिरं कालं अणेयजणणीण मुणिपवर ॥१७॥
 पीओ सि थणच्छीरं अणंतजम्मंतराइं जणणीणं ।
 अण्णाण्णाण महाजस सायरसलिलादु अहिययरं ॥१८॥
 तुह मरणे दुक्खेण अण्णाण्णाणं अणेयजणणीणं ।
 रुण्णाण णयणणीर सायरसलिलादु अहिययरं ॥१९॥
 भवसायरे अणंते छिण्णुज्झिय केसणहरणालट्ठी ।
 पुब्बइ जइ को वि जए हवदि य गिरिसमधिया रासी ॥२०॥
 जलथलसिहिपवणंवरगिरिसरिदरितरुवणाइ सव्वत्थ ।
 वसिओ सि चिरं कालं तिहुवणमज्झे अणप्पवसो ॥२१॥

गसियाइं पुगलाइं भुवणोदरवत्तियाइं सव्वाइं ।
 पत्तो सि तो ण तित्तिं पुणरुत्तं ताइं भुज्जंतो ॥२२॥
 तिहुयणसलिलं सयलं पीयं तिण्हाए पीडिण तुमे ।
 तो वि ण तण्हाछेओ जाओ चिंतेह भवमहणं ॥२३॥
 गहिउज्झियाइं मुणिवर कलेवराइं तुमे अणेयाइं ।
 ताणं णत्थि पमाणं अणंतभवसायरे धीर ॥२४॥
 विसवेयणरत्तक्खयभयसत्थग्गहणसंकिलेसेणं ।
 आहारुस्सासाणं णिरोहणा खिज्जए आऊ ॥२५॥
 हिमजलणसलिलगुरुयरपव्वयतरुहणपडणभंगेहिं ।
 रसविज्जजोयधारण अणयपसंगेहिं विविहेहिं ॥२६॥
 इय तिरियमणुयजम्मे सुइरं उववज्झिऊण बहुवारं ।
 अवमिच्चुमहादुक्खं तिब्बं पत्तो सि तं मित्त ॥२७॥
 छत्तीस तिणिण सया छावट्टिसहस्सवारमरणाणि ।
 अंतोमुहुत्तमज्झे पत्तो सि निगोयवासम्मि ॥२८॥
 वियलिंदए असीदी सट्ठी चालीसमेव जाणेह ।
 पंचिंदिय चउवीसं खुद्दभवंतोमुहुत्तस्स ॥२९॥
 रयणत्तये अलब्धे एवं भमिओ सि दीहसंसारे ।
 इय जिणवरेहिं भणियं तं रयणत्तय समायरह ॥३०॥
 अप्पा अप्पम्मि रओ सम्माइट्ठी हवेइ फुडु जीवो ।
 जाणइ तं सण्णाणं चरदिहं चारित्त मग्गो त्ति ॥३१॥
 अण्णे कुमरणमरणं अणेयजम्मंतराइं मरिओ सि ।
 भावहि सुमरणमरणं जरमरणविणासणं जीव! ॥३२॥
 सो णत्थि दव्वसवणो परमाणुपमाणमेत्तओ णिलओ ।
 जत्थ ण जाओ ण मओ तियलोयपमाणिओ सव्वो ॥३३॥
 कालमणंतं जीवो जम्मजरामरणपीडिओ दुक्खं ।
 जिणलिंगेण वि पत्तो परंपराभावरहिण ॥३४॥
 पडिदेससमयपुगलआउगपरिणामणामकालट्ठं ।
 गहिउज्झियाइं बहुसो अणंतभवसायरे जीव ॥३५॥

तेयाला तिणि सया रज्जूणं लोयखेत्तपरिमाणं ।
 मुत्तूणट्ट पएसा जत्थ ण दुरुदुल्लिओ जीवो ॥३६॥
 एक्केक्कंगुलि वाही छण्णवदी होंति जाण मणुयाणं ।
 अवसेसे य सरीरे रोया भण कित्तिया भणिया ॥३७॥
 ते रोया वि य सयला सहिया ते परवसेण पुव्वभवे ।
 एवं सहसि महाजस किं वा बहुएहिं लविएहिं ॥३८॥
 पित्तंतमुत्तफेफसकालिज्जयरुहिरखरिसकिमिजाले ।
 उयरे वसिओ सि चिरं णवदसमासेहिं पत्तेहिं ॥३९॥
 दियसंगट्टियमसणं आहारिय मायभुत्तमण्णांते ।
 छद्दिखरिसाण मज्झे जढरे वसिओ सि जणणीए ॥४०॥
 सिसुकालेच अयाणे असुईमज्झम्मि लोलिओसि तुमं ।
 असुई असिया बहुसो मुणिवर बालत्तपत्तेण ॥४१॥
 मंसट्टिसुक्कसोणियपित्तंतसवत्तकुणिमदुग्गंधं ।
 खरिसवसापूय खिब्भिस भरियं चित्तेहि देहउडं ॥४२॥
 भावविमुत्तो मुत्तो ण य मुत्तो बंधवाइमित्तेण ।
 इय भाविऊण उज्झसु गंधं अब्भंतंरं धीर ॥४३॥
 देहादिचत्तसंगो माणकसाएण कलुसिओ धीर ! ।
 अत्तावणेण जादो बाहुबली कित्तिं कालं ॥४४॥
 महुपिंगो णाम मुणी देहाहारादिचित्तवावारो ।
 सवणत्तणं ण पत्तो णियाणमित्तेण भवियणुय ॥४५॥
 अण्णं च वसिट्ठमुणी पत्तो दुक्खं णियाणदोसेण ।
 सो णत्थि वासठाणो जत्थ ण दुरुदुल्लिओ जीवो ॥४६॥
 सो णत्थि तप्पएसो चउरासीलक्खजोणिवासम्मि ।
 भावविरओ वि सवणो जत्थ णं दुरुदुल्लिओ जीव ॥४७॥
 भावेण होइ लिंगी ण हु लिंगी होइ दव्वमित्तेण ।
 तम्हा कुणिज्ज भावं किं कीरइ दव्वलिंगेण ॥४८॥
 दंडयणयरं सयलं डहिओ अब्भंतरेण दोसेण ।
 जिणलिंगेण वि बाहू पडिओ सो रउरवे णरए ॥४९॥

अवरो वि दव्वसवणो दंसणवरणाणचरणपब्भट्ठो ।
 दीवायणो त्ति णामो अणंतसंसारिओ जाओ ॥५०॥
 भावसमणो य धीरो जुवईजणबेढियो विसुद्धमई ।
 णामेण सिवकुमारो परीत्तसंसारिओ जादो ॥५१॥
 केवलिजिणपण्णत्तं एयादसअंग सयलसुयणाणं ।
 पढिओ अभव्वसेणो ण भावसवणत्तणं पत्तो ॥५२॥
 तुसमासं घोसंतो भावविसुद्धो महाणुभावो य ।
 णामेण य सिवभूई केवलणाणी फुडं जाओ ॥५३॥
 भावेण होइ णगो बाहिरलिंगेण किं च णगोण ।
 कम्मपयडीण णियरं णासइ भावेण दव्वेण ॥५४॥
 णगत्तणं अकज्जं भावणरहियं जिणेहिं पण्णत्तं ।
 इय णारुण य णिच्चं भाविज्जहि अप्पयं धीर ॥५५॥
 देहादिसंगरहिओ माणकसाएहिं सयलपरिचित्तो ।
 अप्पा अप्पम्मि रओ स भावलिंगी हवे साहू ॥५६॥
 ममत्तिं परिवज्जामि णिम्ममत्तिमुवट्ठिदो ।
 आलंबणं च मे आदा अवसेसाइं वोसरे ॥५७॥
 आदा खु मज्झ णाणे आदा मे दंसणे चरित्ते य ।
 आदा पच्चक्खाणे आदा मे संवरे जोगे ॥५८॥
 एगो मे सस्सदो अप्पा णाणदंसणलक्खणो ।
 सेसा मे बाहिरा भावा सव्वे संजोगलक्खणा ॥५९॥
 भावेह भावसुद्धं अप्पा सुविशुद्धणिम्मलं चेव ।
 लहु चउगइ चइऊणं जइ इच्छह सासयं सुक्खं ॥६०॥
 जो जीवो भावंतो जीवसहावं सुभावसंजुत्तो ।
 सो जरमरणविणासं कुणइ फुडं लहइ णिव्वाणं ॥६१॥
 जीवो जिणपण्णत्तो णाणसहावो य चेयणासहिओ ।
 सो जीवो णायव्वो कम्मक्खयकरणणिम्मित्तो ॥६२॥
 जेसिं जीवसहावो णत्थि अभावो य सव्वहा तत्थ ।
 ते होंति भिण्णदेहा सिद्धा वचिगोयरमदीदा ॥६३॥

अरसमरूवमगंधं अव्वत्तं चेदणागुणमसदं ।
 जाण अलिंगगहणं जीवमणिदिट्ठसंठाणं ॥६४॥
 भावहि पंचपयारं णाणं अण्णाणणासणं सिग्घं ।
 भावणभावियसहिओ दिवसिवसुहभायणो होइ ॥६५॥
 पढिण वि किं कीरइ किं वा सुणिण भावरहिण ।
 भावो कारणभूदो सायारणयारभूदाणं ॥६६॥
 दव्वेण सयल णग्गा णारयतिरिया य सयलसंघाया ।
 परिणामेण असुद्धा ण भावसवणत्तणं पत्ता ॥६७॥
 णग्गो पावइ दुक्खं णग्गो संसारसायरे भमइ ।
 णग्गो ण लहइ बोहिं जिणभावणवज्जिओ सुइरं ॥६८॥
 अयसाण भायणेय य किं ते णग्गेण पावमलिणेण ।
 पेसुण्णहासमच्छरमायाबहुलेण सवणेण ॥६९॥
 पयडहिं जिणवरलिंगं अब्भितरभावदोसपरिसुद्धो ।
 भावमलेण य जीवो बाहिरसंगम्मि मयलियइ ॥७०॥
 धम्मम्मि णिप्पवासो दोसावासो य उच्छुफुल्लसमो ।
 णिप्फलिग्गुणयारो णडसवणो णग्गरूवेण ॥७१॥
 जे रायसंगजुत्ता जिणभावणरहियदव्वणिगंथा ।
 ण लहंति ते समाहिं बोहिं जिणसासणे विमले ॥७२॥
 भावेण होइ णग्गो मिच्छत्ताई य दोस चइऊणं ।
 पच्छा दव्वेण मुणी पयडदि लिंगं जिणाणाए ॥७३॥
 भावो वि दिव्वसिवसुक्खभायणो भाववज्जिओ सवणो ।
 कम्ममलमलिणचित्तो तिरियालयभायणो पावो ॥७४॥
 खयरामरमणुयकरंजलिमालाहिं च संथुया विउला ।
 चक्कहरायलच्छी लब्भइ बोही सुभावेण ॥७५॥
 भावं तिविहपयारं सुहासुहं सुद्धमेव णायव्वं ।
 असुहं च अट्टरउदं सुह धम्मं जिणवरिंदेहिं ॥७६॥
 सुद्धं सुद्धसहावं अप्पा अप्पम्मि तं च णायव्वं ।
 इदि जिणवरेहिं भणियं जं सेयं तं समायरह ॥७७॥

पयलियमाणकसाओ पयलियमिच्छत्तमोहसमचित्तो ।
 पावइ तिहुवणसारं बोही जिणसासणे जीवो ॥७८॥
 विसयविरत्तो समणो छद्दसवरकारणाइं भाऊण ।
 तित्थयरणामकम्मं बंधइ अइरेण कालेण ॥७९॥
 बारसविहतवयरणं तेरसकिरियाउ भाव तिविहेण ।
 धरहि मणमत्तदुरियं णाणंकुसएण मुणिपवर ॥८०॥
 पंचविहचेलचायं खिदिसयणं दुविहसंजमं भिक्खू ।
 भावं भावियपुव्वं जिणलिंगं णिम्मलं सुद्धं ॥८१॥
 जह रयणाणं पवरं वज्जं जह तरुगणाण गोसीरं ।
 तह धम्माणं पवरं जिणधम्मं भाविभवमहणं ॥८२॥
 पूयादिसु वयसहियं पुण्णं हि जिणेहिं सासणे भणियं ।
 मोहक्खोहविहीणो परिणामो अप्पणो धम्मो ॥८३॥
 सद्दहदि य पत्तेदि य रोचेदि य तह पुणो वि फासेदि ।
 पुण्णं भोयणिमित्तं ण हु सो कम्मक्खयणिमित्तं ॥८४॥
 अप्पा अप्पम्मि रओ रायादिसु सयलदोसपरिचत्तो ।
 संसारतरणहेदू धम्मो त्ति जिणेहिं णिद्धिद्वं ॥८५॥
 अह पुण अप्पा णिच्छदि पुण्णाइं करेदि णिरवसेसाइं ।
 तह वि ण पावदि सिद्धिं संसारत्थो पुणो भणिदो ॥८६॥
 एएण कारणेण य तं अप्पा सद्देह तिविहेण ।
 जेण य लहेह मोक्खं तं जाणिज्जह पयत्तेण ॥८७॥
 मच्छो वि सालिसित्थो असुद्धभावो गओ महाणरयं ।
 इय णाउं अप्पाणं भावह जिणभावणं णिच्चं ॥८८॥
 बाहिरसंगच्चाओ गिरिसरिदरिकंदराइ आवासो ।
 सयलो णाणज्झयणो णिरत्थओ भावरहियाणं ॥८९॥
 भंजसु इन्दियसेणं भंजसु मणमक्कडं पयत्तेण ।
 मा जणरंजणकरणं बाहिरवयवेस तं कुणसु ॥९०॥
 णवणोकसायवगं मिच्छत्तं चयसु भावसुद्धीए ।
 चेइयपवयणगुरुणं करेहि भत्तिं जिणाणाए ॥९१॥

तित्थयरभासियत्थं गणहरदेवेहिं गंथियं सम्मं ।
 भावहि अणुदिणु अतुलं विसुद्धभावेण सुयणाणं ॥१२॥
 पीऊण णाणसलिलं णिम्महतिसडाहसोसउम्मुक्का ।
 होंति सिवालयवासी तिहुवणचूडामणी सिद्धा ॥१३॥
 दस दस दो सुपरीसह सहहि मुणी सयलकाल काण ।
 सुत्तेण अण्णमत्तो संजमघादं पमोत्तूण ॥१४॥
 जह पत्थरो ण भिज्जइ परिट्ठिओ दीहकालमुदण ।
 तह साहू वि ण भिज्जइ उवसग्गपरीसहेहिंतो ॥१५॥
 भावहि अणुवेक्खाओ अवरे पणवीसभावणा भावि ।
 भावरहिण किं पुण बाहिरलिंगेण कायव्वं ॥१६॥
 सव्वविरओ वि भावहि णव य पयत्थाइं सत्त तच्चाइं ।
 जीवसमासाइं मुणी चउदसगुणठाणणामाइं ॥१७॥
 णवविहबंभं पयडहि अब्बंभं दसविहं पमोत्तूण ।
 मेहुणसण्णासत्तो भमिओ सि भवण्णवे भीमे ॥१८॥
 भावसहिदो य मुणिणो पावइ आराहणाचउक्कं च ।
 भावरहिदो य मुणिवर भमइ चिरं दीहसंसारे ॥१९॥
 पावंति भावसवणा कल्लाणपरंपराइं सोक्खाइं ।
 दुक्खाइं दव्वसवणा णरतिरियकुदेवजोणीए ॥१००॥
 छायालदोसदूसियमसणं गसिउं असुद्धभावेण ।
 पत्तो सि महावसणं तिरियगईए अणप्पवसो ॥१०१॥
 सच्चित्तभत्तपाणं गिद्धीं दप्पेणऽधी पभुत्तूण ।
 पत्तो सि तिव्वदुक्खं अणाइकालेण तं चिंत ॥१०२॥
 कंदं मूलं बीयं पुप्फं पत्तादि किंचि सच्चित्तं ।
 असिऊण माणगव्वं भमिओ सि अणतसंसारे ॥१०३॥
 विणयं पंचपयारं पालहि मणवयकायजोएण ।
 अविणयणरा सुविहियं तत्तो मुत्तिं न पावंति ॥१०४॥
 णियसत्तीए महाजस भत्तीराएण णिच्चकालम्मि ।
 तं कुण जिणभत्तिपरं विज्जावच्चं दसवियप्पं ॥१०५॥

जं किंचि कयं दोसं मणवयकाएहिं असुहभावेण ।
तं गरहि गुरुसयासे गारव मायं च मोत्तूण ॥१०६॥
दुज्जणवयणचडक्कं णिट्ठुरकडुयं सहंति सप्पुरिसा ।
कम्ममलणासणट्ठं भावेण य णिम्ममा सवणा ॥१०७॥
पावं खवइ असेसं खमाए पडिमंडिओ य मुणिपवरो ।
खेयरअमरणराणं पसंसणीओ धुवं होइ ॥१०८॥
इय णाऊण खमागुण खमेहि तिविहेण सयल जीवाणं ।
चिरसंचियकोहसिहिं वरखमसलिलेण सिंचेह ॥१०९॥
दिक्खाकालाईयं भावहि अवियारदंसणविसुद्धो ।
उत्तमबोहिणिमित्तं असारसाराणि मुणिऊण ॥११०॥
सेवहि चउविहलिंगं अब्भंतरलिंगसुद्धिमावण्णो ।
बाहिरलिंगमकज्जं होइ फुडं भावरहियाणं ॥१११॥
आहारभयपरिगहमेहुणसण्णाहि मोहिओ सि तुमं ।
भमिओ संसारवणे अणाइकालं अणप्पवसो ॥११२॥
बाहिरसयणत्तावणतरुमूलाईणि उत्तरगुणाणि ।
पालहि भावविशुद्धो पूयालाहं ण ईहंतो ॥११३॥
भावहि पढमं तच्चं बिदियं तदियं चउत्थ पंचमयं ।
तियरणसुद्धो अप्पं अणाइणिहणं तिवग्गहरं ॥११४॥
जाव ण भावइ तच्चं जाव ण चित्तेइ चित्तणीयाइं ।
ताव ण पावइ जीवो जरमरणविवज्जियं ठाणं ॥११५॥
पावं हवइ असेसं पुण्णमसेसं च हवइ परिणामा ।
परिणामादो बंधो मुक्खो जिणसासणे दिट्ठो ॥११६॥
मिच्छत्त तह कसायासंजमजोगेहिं असुहलेसेहिं ।
बंधइ असुहं कम्मं जिणवयणपरम्महो जीवो ॥११७॥
तव्विवरीओ बंधइ सुहकम्मं भावसुद्धिमावण्णो ।
दुविहपयारं बंधइ संखेपेणेव वज्जरियं ॥११८॥
णाणावरणादीहिं य अट्ठहिं कम्मेहिं वेढिओ य अहं ।
डहिऊण इण्हिं पयडमि अणंतणाणाइगुणचित्तां ॥११९॥

सीलसहस्सट्ठारस चउरासीगुणगणाण लक्ख्वाइं ।
 भावहि अणुदिणु णिहिलं असप्पलावेण किं बहुणा ॥१२०॥
 झायहि धम्मं सुक्कं अट्ट रउदं च झाण मुत्तूण ।
 रुद्धु झाइयाइं इमेण जीवेण चिरकालं ॥१२१॥
 जे के वि दव्वसवणा इंदियसुहआउला ण छिंदंति ।
 छिंदंति भावसवणा झाणकुढारेहिं भवरुक्खं ॥१२२॥
 जह दीवो गब्भहरे मारुयबाहाविवज्जिओ जलइ ।
 तह रायाणिलरहिओ झाणपर्इवो वि पज्जलइ ॥१२३॥
 झायहि पंच वि गुरवे मंगलचउसरणलोयपरियरिए ।
 णरसुरखेयरमहिए आराहणणायगे वीरे ॥१२४॥
 णाणमयविमलसीयलसलिलं पाऊण भविय भावेण ।
 वाहिजरमरणवेयणडाहविमुक्का सिवा होंति ॥१२५॥
 जह बीयम्मि य दइडे ण वि रोहइ अंकुरो य महिवीढे ।
 तह कम्मबीयदइडे भवंकुरो भावसवणाणं ॥१२६॥
 भावसवणो वि पावइ सुक्खाइं दुहाइं दव्वसवणो य ।
 इय णाउं गुणदोसे भावेण य संजुदो होह ॥१२७॥
 तित्थयरगणहराइं अब्भुदयपरंपराइं सोक्खाइं ।
 पावंति भावसहिया संखेवि जिणेहिं वज्जरियं ॥१२८॥
 ते धण्णा ताण णमो दंसणवरणाणचरणसुद्धाणं ।
 भावसहियाण णिच्चं तिविहेण पणट्टमायाणं ॥१२९॥
 इड्ढिमतुलं विउव्विय किण्णरकिंपुरिसअमरखयरेहिं ।
 तेहिं वि ण जाइ मोहं जिणभावणभाविओ धीरो ॥१३०॥
 किं पुण गच्छइ मोहं णरसुरसुक्खाण अप्पसाराणं ।
 जाणंतो पस्संतो चिंतंतो मोक्ख मुणिधवलो ॥१३१॥
 उत्थरह जा ण जरओ रोयण्णी जा ण डहइ देहउडिं ।
 इन्दियबलं ण वियलइ ताव तुमं कुणहि अप्पहिंय ॥१३२॥
 छज्जीव छडायदणं णिच्चं मणवयणकायजोएहिं ।
 कुरु दय परिहर मुणिवर भावि अपुव्वं महासत्तं ॥१३३॥

दसविहपाणाहारो अणंतभवसायरे भमंतेण ।
 भोयसुहकारणट्ठं कदो य तिविहेण सयलजीवाणं ॥१३४॥
 पाणिवहेहि महाजस चउरासीलक्खजोगिमज्झम्मि ।
 उप्पजंत मरंतो पत्तो सि गिरंतरं दुक्खं ॥१३५॥
 जीवाणमभयदाणं देहि मुणी पाणिभूयसत्ताणं ।
 कल्लाणसुहणिमित्तं परंपरा तिविहसुद्धीए ॥१३६॥
 असियसय किरियवाई अक्किरियाणं च होइ चुलसीदी ।
 सत्तट्ठी अण्णाणी वेणईया होंति बत्तीसा ॥१३७॥
 णमुयइ पयडिअभव्वोसुट्ठुवि आयणिऊणजिणधम्मं ।
 गुडदुद्धं पि पिबंता ण पण्णया णिव्विसा होंति ॥१३८॥
 मिच्छत्तछण्णदिट्ठी दुद्धीए दुम्मएहिं दोसेहिं ।
 धम्मं जिणपण्णत्तं अभव्वजीवो ण रोचेदि ॥१३९॥
 कुच्छियधम्मम्मि रओ कुच्छियपासंडिभत्तिसंजुत्तो ।
 कुच्छियतवं कुणंतो कुच्छियगइभायणो होइ ॥१४०॥
 इय मिच्छत्तावासे कुणयकुसत्थेहिं मोहिओ जीवो ।
 भमिओ अणाइकालं संसारे धीर चिंतेहि ॥१४१॥
 पासंडी तिण्णि सया तिसट्ठि भेया उमग्ग मुत्तूण ।
 रुंभहि मणु जिणमग्गे असप्पलावेण किं बहुणा ॥१४२॥
 जीवविमुक्को सबओ दंसणमुक्को य होइ चलसबओ ।
 सबओ लोयअपुज्जो लोउत्तरयम्मि चलसबओ ॥१४३॥
 जह तारयाण चंदो मयराओ मयउलाण सव्वाणं ।
 अहिओ तह सम्मत्तो रिसिसावयदुविहधम्माणं ॥१४४॥
 जह फणिराओ सोहइ फणमणिमाणिक्ककिरणविप्फुरिओ ।
 तह विमलदंसणधरो जिणभत्ती पवयणे जीवो ॥१४५॥
 जह तारायणसहियं ससहरबिंबं खमंडले विमले ।
 भाविय तववयविमलं जिणलिंगं दंसणविसुद्धं ॥१४६॥
 इय णाउं गुणदोसं दंसणरयणं धरेह भावेण ।
 सारं गुणरयणाणं सोवाणं पढम मोक्खस्स ॥१४७॥

कत्ता भोइ अमुत्तो सरीरमित्तो अणाइणिहणो य ।
 दंसणणाणुवओगो णिहिट्ठो जिणवरिंदेहिं ॥१४८॥
 दंसणणाणावरणं मोहणियं अंतराइयं कम्मं ।
 णिट्ठवइ भवियजीवो सम्मं जिणभावणाजुत्तो ॥१४९॥
 बलसोक्खणाणदंसण चत्तारि वि पयडा गुणा होंति ।
 णट्ठे घाइचउक्के लोयालोयं पयासेदि ॥१५०॥
 णाणी सिव परमेट्ठी सव्वण्हू विण्हू चउमुहो बुद्धो ।
 अप्पो वि य परमप्पो कम्मविमुक्को य होइ फुडं ॥१५१॥
 इय घाइकम्ममुक्को अट्टारहदोसवज्जिओ सयलो ।
 तिहुवणभवणपदीवो देउ ममं उत्तमं बोहिं ॥१५२॥
 जिणवरचरणंबुरुहं णमंति जे परमभत्तिराएण ।
 ते जम्मवेल्लिमूलं खणंति वरभावसत्थेण ॥१५३॥
 जह सलिलेण ण लिप्पइ कमलिणिपत्तं सहावपयडीए ।
 तह भावेण ण लिप्पइ कसायविसएहिं सप्पुरिसो ॥१५४॥
 ते च्चिय भणामि हं जे सयलकलासीलसंजमगुणेहिं ।
 बहुदोसाणावासो सुमलिणचित्तो ण सावयसमो सो ॥१५५॥
 ते धीरवीरपुरिसा खमदमखग्गेण विप्फुरंतेण ।
 दुज्जयपबलबलुद्धरकसायभड णिज्जिया जेहिं ॥१५६॥
 धण्णा ते भगवंता दंसणणाणगपवरहत्थेहिं ।
 विसयमयरहरपडिया भविया उत्तारिया जेहिं ॥१५७॥
 मायावेल्लि असेसा मोहमहातरुवरम्मि आरूढा ।
 विसयविसपुप्फुल्लिय लुणंति मुणि णाणसत्थेहिं ॥१५८॥
 मोहमयगारवेहिं य मुक्का जे करुणभावसंजुत्ता ।
 ते सव्वदुरियखंभं हणंति चारित्तखग्गेण ॥१५९॥
 गुणगणमणिमालाए जिणमयगयणे णिसायरमुणिंदो ।
 तारावलिपरियरिओ पुण्णिमइं दुव्व पवणपहे ॥१६०॥
 चक्कहररामकेसवसुरवरजिणगणहराइसोक्खाइं ।
 चारणमुणिरिद्धीओ विसुद्धभावा णरा पत्ता ॥१६१॥

सिवमजरामरलिंगमणोवममुत्तमं परमविमलमतुलं ।
 पत्ता वरसिद्धिसुहं जिणभावणभाविया जीवा ॥१६२॥
 ते मे तिहुवणमहिया सिद्धा सुद्धा णिरंजणा णिच्चा ।
 दिंतु वरभावसुद्धिं दंसण णाणे चरित्ते य ॥१६३॥
 किं जंपिण्ण बहुणा अत्थो धम्मो य काममोक्खो च ।
 अण्णे वि य वावारा भावम्मि परिठिठया सव्वे ॥१६४॥
 इय भावपाहुडमिणं सव्वंबुद्धेहि देसियं सम्मं ।
 जो पढइ सुणइ भावइ सो पावइ अविचलं ठाणं ॥१६५॥

मोक्षपाहुड

णाणमयं अप्पाणं उवलद्धं जेण झडियकम्मेण ।
 चइऊण य परदव्वं णमो णमो तस्स देवस्स ॥१॥
 णमिऊण य तं देवं अणंतवरणाणदंसणं सुद्धं ।
 वोच्छं परमप्पाणं परमपयं परमजोईणं ॥२॥
 जं जाणिऊण जोई जोअत्थो जोइऊण अणवरयं ।
 अब्बाबाहमणंतं अणोवमं लहइ णिव्वाणं ॥३॥
 तिपयारो सो अप्पा परमंतरबाहिरो हु देहीणं ।
 तत्थ परो झाइज्जइ अंतोवाएण चइवि बहिरप्पा ॥४॥
 अक्खाणि बाहिरप्पा अंतरअप्पा तु अप्पसंकप्पो ।
 कम्मकलंकविमुक्को परमप्पा भण्णए देवो ॥५॥
 मलरहिओ कलचत्तो अणिंदिओ केवलो विसुद्धप्पा ।
 परमेट्ठी परमजिणो सिवकरो सासओ सिद्धो ॥६॥
 आरुहवि अन्तरप्पा बहिरप्पा छंडिऊण तिविहेण ।
 झाइज्जइ परमप्पा उवइट्ठं जिणवरिंदेहिं ॥७॥
 बहिरत्थे फुरियमाणो इंदियदारेण णियसरूवचुओ ।
 णियदेहं अप्पाणं अज्झवसदि मूढदिट्ठीओ ॥८॥
 णियदेहसरिच्छं पिच्छिऊण परविग्गहं पयत्तेण ।
 अच्छेयणं पि गहियं झाइज्जइ परमभावेण ॥९॥

सपरज्झवसाएणं देहेसु य अविदिदत्थमप्पाणं ।
 सुयदाराईविसए मणुयाणं वड्ढए मोहो ॥१०॥
 मिच्छाणाणेसु रओ मिच्छाभावेण भाविओ संतो ।
 मोहोदएण पुणरवि अंगं सं मण्णए मणुओ ॥११॥
 जो देहे णिरवेक्खो णिदंदो णिम्ममो णिरारंभो ।
 आदसहावे सुरओ जोई सो लहइ णिव्वाणं ॥१२॥
 परदव्वरओ बज्झदि विरओ मुच्चेइ विविहकम्मेहिं ।
 ऐसो जिणउवदेसो समासदो बंधमुक्खस्स ॥१३॥
 सदव्वरओ सवणो सम्माइट्ठी हवेइ णियमेण ।
 सम्मत्तपरिणदो उण खवेइ दुट्ठकम्माइं ॥१४॥
 जो पुण परदव्वरओ मिच्छादिट्ठी हवेइ सो साहू ।
 मिच्छत्तपरिणदो पुण बज्झदि दुट्ठकम्मेहिं ॥१५॥
 परदव्वादो दुग्गई सदव्वादो हु सुग्गई होइ ।
 इय णाऊण सदव्वे कुणह रई विरइ इयरम्मि ॥१६॥
 आदसहावादणं सच्चित्ताचित्तमिस्सियं हवदि ।
 तं परदव्वं भणियं अवितत्थं सव्वदरिसीहिं ॥१७॥
 दुट्ठकम्मरहियं अणोवमं णाणविग्गहं णिच्चं ।
 सुद्धं जिणेहिं कहियं अप्पाणं हवदि सदव्वं ॥१८॥
 जे ज्ञायंति सदव्वं परदव्वपरम्मुहा दु सुचरित्ता ।
 ते जिणवराण मग्गे अणुलग्गा लहहिं णिव्वाणं ॥१९॥
 जिणवरमएण जोई ज्ञाणे ज्ञाएह सुद्धमप्पाणं ।
 जेण लहइ णिव्वाणं ण लहइ किं तेण सुरलोयं ॥२०॥
 जो जाइ जोयणसयं दियहेणेक्केण लेवि गुरुभारं ।
 सो किं कोसद्धं पि हु ण सक्कए जाउ भुवणयले ॥२१॥
 जो कोडिए ण जिप्पइ सुहडो संगामएहिं सव्वेहिं ।
 सो किं जिप्पइ इक्किं णरेण संगामए सुहडो ॥२२॥
 सगं तवेण सव्वो वि पावए तहिं वि ज्ञाणजोएण ।
 जो पावइ सो पावइ परलोए सासयं सोक्खं ॥२३॥

अइसोहणजोएणं सुद्धं हेमं हवेइ जह तह य ।
 कालाईलब्धीए अप्पा परमप्पओ हवदि ॥२४॥
 वर वयतवेहि सग्गो मा दुक्खं होउ णिरइ इयरेहिं ।
 छायातवट्ठियाणं पडिवालंताण गुरुभेयं ॥२५॥
 जो इच्छइ णिस्सरिदुं संसारमहण्णवाउ रुद्धाओ ।
 कम्मिंधणाण डहणं सो झायइ अप्पयं सुद्धं ॥२६॥
 सव्वे कसाय मोत्तुं गारवमयरायदोसवामोहं ।
 लोयववहारविरदो अप्पा झाएह झाणत्थो ॥२७॥
 मिच्छत्तं अण्णाणं पावं पुण्णं चएवि तिविहेण ।
 मोणव्वएण जोई जोयत्थो जोयए अप्पा ॥२८॥
 जं मया दिस्सदे रूवं तं ण जाणादि सव्वहा ।
 जाणगं दिस्सदे णेव तम्हा जंपेमि केण हं ॥२९॥
 सव्वासवणिरोहेण कम्मं खवदि संचिदं ।
 जोयत्थो जाणए जोई जिणदेवेण भासियं ॥३०॥
 जो सुत्तो ववहारे सो जोई जग्गए सकज्जम्मि ।
 जो जग्गदि ववहारे सो सुत्तो अप्पणो कज्जे ॥३१॥
 इय जाणिऊण जोई ववहारं चयइ सव्वहा सव्वं ।
 झायइ परमप्पाणं जह भणियं जिणवरिंदेहिं ॥३२॥
 पंचमहव्वयजुत्तो पंचसु समिदीसु तीसु गुत्तीसु ।
 रयणत्तयसंजुत्तो झाणज्झयणं सया कुणह ॥३३॥
 रयणत्तयमाराहं जीवो आराहओ मुणेयव्वो ।
 आराहणविहाणं तस्स फलं केवलं णाणं ॥३४॥
 सिद्धो सुद्धो आदा सव्वण्हू सव्वलोयदरिसी य ।
 सो जिणवरेहिं भणिओ जाण तुमं केवलं णाणं ॥३५॥
 रयणत्तयं पि जोई आराहइ जो हु जिणवरमएण ।
 सो झायदि अप्पाणं परिहरइ परं ण संदेहो ॥३६॥
 जं जाणइ तं णाणं जं पिच्छइ तं च दंसणं णेयं ।
 तं चारित्तं भणियं परिहारो पुण्णपावाणं ॥३७॥

तच्चरुई सम्मत्तं तच्चग्गहणं च हवइ सण्णाणं ।
 चारित्तं परिहारो परूवियं जिणवरिंदेहिं ॥३८॥
 दंसणसुद्धो सुद्धो दंसणसुद्धो लहेइ णिव्वाणं ।
 दंसणविहीणपुरिसो ण लहइ तं इच्छिय लाहं ॥३९॥
 इय उवएसं सारं जरमरणहरं खु मण्णए जं तु ।
 तं सम्मत्तं भणियं सवणाणं सावयाणं पि ॥४०॥
 जीवाजीवविहत्ती जोई जाणेइ जिणवरमएण ।
 तं सण्णाणं भणियं अवियत्थं सव्वदरसीहिं ॥४१॥
 जं जाणिऊण जोई परिहारं कुणइ पुण्णपावाणं ।
 तं चारित्तं भणियं अवियप्प कम्मरहिं ॥४२॥
 जो रयणत्तयजुत्तो कुणइ तवं संजदो ससत्तीए ।
 सो पावइ परमपयं झायंतो अप्पयं सुद्धं ॥४३॥
 तिहितिणिधरविणिच्चंतियरहिओतहतिणपरियरिओ ।
 दोदोसविप्पमुक्को परमप्पा झायए जोई ॥४४॥
 मयमायकोहरहिओ लोहेण विवज्जिओ य जो जीवो ।
 णिम्मलसहावजुत्तो सो पावइ उत्तमं सोक्खं ॥४५॥
 विसयकसाएहि जुदो रुद्धो परमप्पभावरहियमणो ।
 सो ण लहइ सिद्धिसुहं जिणमुद्दपरम्मुहो जीवो ॥४६॥
 जिणमुद्दं सिद्धिसुहं हवेइ णियमेण जिणवरुद्धिं ।
 सिविणे वि ण रुच्चइ पुण जीवा अच्छंति भवगहणे ॥४७॥
 परमप्पय झायंतो जोई मुच्चेई मलदलोहेण ।
 णादियदि णवं कम्मं णिद्धिं जिणवरिंदेहिं ॥४८॥
 होऊण दिढचरित्तो दिढसम्मत्तेण भावियमईओ ।
 झायंतो अप्पाणं परमपयं पावए जोई ॥४९॥
 चरणं हवइ सधम्मो धम्मो सो हवइ अप्पसमभावो ।
 सो रागरोसरहिओ जीवस्स अणण्णपरिणामो ॥५०॥
 जह फलिहमणि विसुद्धो परदव्वजुदो हवेइ अण्णं सो ।
 तह रागादिविजुत्तो जीवा हवदि हु अणण्णविहो ॥५१॥

देवगुरुम्मि य भत्तो साहम्मियसंजदेसु अणुरत्तो ।
 सम्मत्तमुव्वहंतो झाणरओ होदि जोई सो ॥५२॥
 उगतवेणण्णाणी जं कम्मं खवदि भवहि बहुएहिं ।
 तं णाणी तिहि गुत्तो खवेइ अंतोमुहुत्तेण ॥५३॥
 सुहजोएण सुभावं परदव्वे कुणइ रागदो साहू ।
 सो तेण दु अण्णाणी णाणी एत्तो दु विवरीओ ॥५४॥
 आसवहेदू य तहा भावं मोक्खस्स कारणं हवदि ।
 सो तेण दु अण्णाणी आदसहावा दु विवरीदु ॥५५॥
 जो कम्मजादमइओ सहावणाणस्स खंडदूसयरो ।
 सो तेण दु अण्णाणी जिणसासणदूसगो भणिदो ॥५६॥
 णाणं चरित्तहीणं दंसणहीणं तवेहिं संजुत्तं ।
 अण्णेसु भावरहियं लिंगगहणेण किं सोक्खं ॥५७॥
 अच्छेयणं पि चेदा जो मण्णइ सो हवेइ अण्णाणी ।
 सो पुण णाणी भणिओ जो मण्णइ चेयणे चेदा ॥५८॥
 तवरहियं जं णाणं णाणविजुत्तो तवो वि अकयत्थो ।
 तम्हा णाणतवेणं संजुत्तो लहइ णिव्वाणं ॥५९॥
 धुवसिद्धी तित्थयरो चउणाणजुदो करेइ तवयरणं ।
 णाऊण धुवं कुज्जा तवयरणं णाणजुत्तो वि ॥६०॥
 बाहिरलिंगेण जुदो अब्भंतरलिंगरहियपरियम्मो ।
 सो सगचरित्तभट्टो मोक्खपहविणासगो साहू ॥६१॥
 सुहेण भाविदं णाणं दुहे जादे विणस्सदि ।
 तम्हा जहाबलं जोई अप्पा दुक्खेहि भावए ॥६२॥
 आहारासणणिदाजयं च काऊण जिनवरमएण ।
 झायव्वो णिय अप्पा णाऊणं गुरुपसाएण ॥६३॥
 अप्पा चरित्तवंतो दंसणणाणेण संजुदो अप्पा ।
 सो झायव्वो णिच्चं णाऊणं गुरुपसाएण ॥६४॥
 दुक्खे णज्जइ अप्पा अप्पा णाऊण भावणा दुक्खं ।
 भावियसहावपुरिसो विसयेसु विरच्चए दुक्खं ॥६५॥

ताम ण णज्जइ अप्पा विसएसु णरो पवट्ठए जाम ।
 विसए विरत्तचित्तो जोई जाणेइ अप्पाणं ॥६६॥
 अप्पा णाऊण णरा केई सब्भावभावपब्भट्ठा ।
 हिडंति चाउरंगं विसएसु विमोहिया मूढा ॥६७॥
 जे पुण विसयविरत्ता अप्पा णाऊण भावणासहिया ।
 छंडंति चाउरंगं तवगुणजुत्ता ण संदेहो ॥६८॥
 परमाणुपमाणं वा परदब्बे रदि हवेदि मोहादो ।
 सो मूढो अण्णाणी आदसहावस्स विवरीओ ॥६९॥
 अप्पा झायंताणं दंसणसुद्धीण दिढचरित्ताणं ।
 होदि धुवं णिव्वाणं विसएसु विरत्तचित्ताणं ॥७०॥
 जेण रागो परे दब्बे संसारस्स हि कारणं ।
 तेणावि जोइणो णिच्चं कुज्जा अप्पे सभावणं ॥७१॥
 णिंदाए य पसंसाए दुक्खे य सुहएसु य ।
 सत्तूणं चेव बंधूणं चारित्तं समभावदो ॥७२॥
 चरियावरिया वदसमिदिवज्जिया सुद्धभावपब्भट्ठा ।
 केई जंपति णरा ण हु कालो झाणजोयस्स ॥७३॥
 सम्मत्तणाणरहिओ अभव्वजीवो हु मोक्खपरिमुक्को ।
 संसारसुहे सुरदो ण हु कालो भणइ झाणस्स ॥७४॥
 पंचसु महव्वदेसु य पंचसु समिदीसु तीसु गुत्तीसु ।
 जो मूढो अण्णाणी ण हु कालो भणइ झाणस्स ॥७५॥
 भरहे दुस्समकाले धम्मज्झाणं हवेइ साहुस्स ।
 तं अप्पसहावठिदे ण हु मण्णइ सो वि अण्णाणी ॥७६॥
 अज्ज वि तिरयणसुद्धा अप्पा झाएवि लहहिं इंदत्तं ।
 लोयंतियदेवत्तं तत्थ चुआ णिव्वुदिं जंति ॥७७॥
 जे पावमोहियमई लिंगं घेतूण जिणवरिंदाणं ।
 पावं कुणंति पावा ते चत्ता मोक्खमग्गम्मि ॥७८॥
 जे पंचचेलसत्ता गंथग्गाही य जायणासीला ।
 आधाकम्मम्मि रय ते चत्ता मोक्खमग्गम्मि ॥७९॥

णिगंथमोहमुक्का बावीसपरीसहा जियकसाया ।
 पावारंभविमुक्का ते गहिया मोक्खमग्गम्मि ॥८०॥
 उद्धद्धमज्झलोये केई मज्झं ण अहयमेगागी ।
 इय भावणाए जोई पावंति हु सासयं सोक्खं ॥८१॥
 देवगुरूणं भत्ता णिव्वेयपरंपरा विचिंतित्ता ।
 झाणरया सुचरित्ता ते गहिया मोक्खमग्गम्मि ॥८२॥
 णिच्छयणयस्स एवं अप्पा अप्पम्मि अप्पणे सुरदो ।
 सो होदि हु सुचरित्तो जोई सो लहइ णिव्वाणं ॥८३॥
 पुरिसायारो अप्पा जोई वरणाणदंसणसमग्गो ।
 जो झायदि सो जोई पावहरो हवदि णिद्वंदो ॥८४॥
 एवं जिणेहि कहियं सवणाणं सावयाण पुण सुणसु ।
 संसारविणासयरं सिद्धियरं कारणं परमं ॥८५॥
 गहिऊण य सम्मत्तं सुणिम्मलं सुरगिरीव णिक्कंपं ।
 तं झाणे झाइज्जइ सावय दुक्खक्खयट्ठाए ॥८६॥
 सम्मत्तं जो झायइ सम्माइट्ठी हवेइ सो जीवो ।
 सम्मत्तपरिणदो उण खवेइ दुट्ठट्ठकम्माणि ॥८७॥
 किं बहुणा भणिणं जे सिद्धा णरवरा गए काले ।
 सिज्झिहहि जे वि भविया तं जाणह सम्ममाहप्पं ॥८८॥
 ते धण्णा सुकयत्था ते सुरा ते वि पंडिया मणुया ।
 सम्मत्तं सिद्धियरं सिविणे वि ण मइलियं जेहिं ॥८९॥
 हिंसारहिए धम्मे अट्टारहदोसवज्जिए देवे ।
 णिगंथे पव्वयणे सदहणं होइ सम्मत्तं ॥९०॥
 जहजायरूवरूवं सुसंजयं सव्वसंगपरिचत्तं ।
 लिंगं ण परावेक्खं जो मण्णइ तस्स सम्मत्तं ॥९१॥
 कुच्छियदेवं धम्मं कुच्छियलिंगं च बंदए जो दु ।
 लज्जाभयगारवदो मिच्छादिट्ठी हवे सो हु ॥९२॥
 सपरावेक्खं लिंगं राई देवं असंजयं वंदे ।
 मण्णइ मिच्छादिट्ठी ण हु मण्णइ सुद्धसम्मत्तो ॥९३॥

सम्माइट्टी सावय धम्मं जिणदेवदेसियं कुणदि ।
 विवरीयं कुव्वंतो मिच्छादिट्टी मुणेयव्वो ॥१४॥
 मिच्छादिट्टी जो सो संसारे संसरेइ सुहरहिओ ।
 जम्मजरमरणपउरे दुक्खसहस्साउले जीवो ॥१५॥
 सम्म गुण मिच्छ दोसो मणेण परिभाविऊण तं कुणसु ।
 जं ते मणस्स रुच्चइ किं बहुणा पलविण्ण तु ॥१६॥
 बाहिरसंगविमुक्को ण वि मुक्को मिच्छ भाव णिगंथो ।
 किं तस्स ठाणमउणं ण वि जाणदि अप्पसमभावं ॥१७॥
 मूलगुणं छित्तूण य बाहिरकम्मं करेइ जो साहू ।
 सो ण लहइ सिद्धिसुहं जिणलिंगविराहगो णियदं ॥१८॥
 किं काहिदि बहिकम्मं किं काहिदि बहुविहं च खवणं तु ।
 किं काहिदि आदावं आदसहावस्स विवरीदो ॥१९॥
 जदि पढदि बहु सुदाणि य जदि काहिदि बहुविहं च चारित्तं ।
 तं बालसुदं चरणं हवेइ अप्पस्स विवरीदं ॥२०॥
 वेरगपरो साहू परदव्वपरम्मुहो य जो होदि ।
 संसारसुहविरत्तो सगसुद्धसुहेसु अणुरत्तो ॥२१॥
 गुणगणविहूसियंगो हेयोपादेयणिच्छिदो साहू ।
 ज्ञाणज्झयणे सुरदो सो पावइ उत्तमं ठाणं ॥२२॥
 णविएहिं जं णविज्जइ झाइज्जइ झाइएहिं अणवरयं ।
 थुव्वंतेहिं थुणिज्जइ देहत्थं किं पि तं मुणह ॥२३॥
 अरुहा सिद्धायरिया उज्झाया साहु पंच परमेट्टी ।
 ते वि हु चिट्ठहि आदे तम्हा आदा हु मे सरणं ॥२४॥
 सम्मत्तं सण्णाणं सच्चारित्तं हि सत्तवं चेव ।
 चउरो चिट्ठहि आदे तम्हा आदा हु मे सरणं ॥२५॥
 एवं जिणपण्णत्तं मोक्खस्स य पाहुडं सुभत्तीए ।
 जो पढइ सुणइ भावइ सो पावइ सासयं सोक्खं ॥२६॥

लिंगपाहुड

काऊण णमोकारं अरहंताणं तहेव सिद्धाणं ।
वोच्छामि समणलिंगं पाहुडसत्थं समासेण ॥१॥
धम्मेण होइ लिंगं ण लिंगमत्तेण धम्मसंपत्ती ।
जाणेहि भावधम्मं किं ते लिंगेण कायव्वो ॥२॥
जो पावमोहिदमदी लिंगं घेतूण जिणवरिंदाणं ।
उवहसदि लिंगिभावं लिंगिम्मिय णारदो लिंगी ॥३॥
णच्चदि गायदि तावं वायं वाएदि लिंगरूवेण ।
सो पावमोहिदमदी तिरिक्खजोणी ण सो समणो ॥४॥
सम्मूहदि रक्खेदि य अट्ठं झाएदि बहुपयत्तेण ।
सो पावमोहिदमदी तिरिक्खजोणी ण सो समणो ॥५॥
कलहं वादं जूवा णिच्चं बहुमाणगव्विओ लिंगी ।
वच्चदि णरयं पाओ करमाणो लिंगिरूवेण ॥६॥
पाओपहदभावो सेवदि य अंबभु लिंगिरूवेण ।
सो पावमोहिदमदी हिंडदि संसारकंतारे ॥७॥
दंसणणाणचरित्ते उवहाणे जइ ण लिंगरूवेण ।
अट्ठं झायदि झाणं अणंतसंसारिओ होदि ॥८॥
जो जोडेदि विवाहं किसिकम्मवणिज्जजीवघादं च ।
वच्चदि णरयं पाओ करमाणो लिंगिरूवेण ॥९॥
चोराण लाउराण च जुद्धं विवादं च तिक्कम्महिं ।
जंतेण दिक्कमाणो गच्छदि लिंगी णरयवासं ॥१०॥
दंसणणाणचरित्ते तवसंजमणियमणिच्चकम्मम्मि ।
पीडयदि वट्टमाणो पावदि लिंगी णरयवासं ॥११॥
कंदप्पाइय वट्टइ करमाणो भोयणेसु रसगिद्धिं ।
मायी लिंगविवाई तिरिक्खजोणी ण सो समणो ॥१२॥
धावदि पिंडणिमित्तं कलहं काऊण भुज्जदे पिंडं ।
अवरपरूई संतो जिणमग्गि ण होइ सो समणो ॥१३॥

गिण्हदि अदत्तदाणं परणिंदा वि य परोक्खदूसेहिं ।
 जिणलिंगं धारंतो चोरेण व होइ सो समणो ॥१४॥
 उप्पडदि पडदि धावदि पुढवीओ खणदि लिंगरूवेण ।
 इरियावहं धारंतो तिरिक्खजोणी ण सो समणो ॥१५॥
 बंधो णिरओ संतो सस्सं खंडेदि तह य वसुहं पि ।
 छिंददि तरुगण बहुसो तिरिक्खजोणी ण सो समणो ॥१६॥
 रागं करेदि णिच्चं महिलावग्गं परं च दूसेदि ।
 दंसणणाणविहीणो तिरिक्खजोणी ण सो समणो ॥१७॥
 पव्वज्जहीणगहिणं णेहं सीसम्मि वट्टदे बहुसो ।
 आयारविणयहीणो तिरिक्खजोणी ण सो समणो ॥१८॥
 एवं सहिओ मुणिवर संजदमज्झम्मि वट्टदे णिच्चं ।
 बहुलं पि जाणमाणो भावविणट्ठो ण सो समणो ॥१९॥
 दंसणणाणचरित्ते महिलावग्गम्मि देदि वीसट्ठो ।
 पासत्थ वि हु णियट्ठो भावविणट्ठो ण सो समणो ॥२०॥
 पुंच्छलिघरि जो भुज्जइ णिच्चं संथुणदि पोसए पिंडं ।
 पावदि बालसहावं भावविणट्ठो ण सो सवणो ॥२१॥
 इय लिंगपाहुडमिणं सव्वंबुद्धेहिं देसियं धम्मं ।
 पालेइ कट्टसहियं सो गाहदि उत्तमं ठाणं ॥२२॥

शीलपाहुड

वीरं विसालणयणं रत्तुप्पलकोमलस्समप्पायं ।
 तिविहेण पणमिऊण सीलगुणाणं णिसामेह ॥१॥
 सीलस्स य णाणस्स य णत्थि विरोहो बुधेहिं णिद्धिट्ठो ।
 णवरि य सीलेण विणा विसया णाणं विणासंति ॥२॥
 दुक्खे णज्जदि णाणं णाणं णाऊण भावणा दुक्खं ।
 भावियमई व जीवो विसयेसु विरज्जए दुक्खं ॥३॥
 ताव ण जाणदि णाणं विसयबलो जाव वट्टए जीवो ।
 विसए विरत्तमेत्तो ण खवेइ पुराइयं कम्मं ॥४॥

णाणं चरित्तहीणं लिंगगहणं च दंसणविहूणं ।
 संजमहीणो य तवो जइ चरइ णिरत्थयं सव्व ॥५॥
 णाणं चरित्तसुद्धं लिंगगहणं च दंसणविसुद्धं ।
 संजमसहिदो य तवो थोओ वि महाफलो होइ ॥६॥
 णाणं णाऊण णरा केई विसयाइभावसंसत्ता ।
 हिंडंति चादुरगदिं विसएसु विमोहिया मूढा ॥७॥
 जे पुण विसयविरत्ता णाणं णाऊण भावणासहिदा ।
 छिंदंति चादुरगदिं तवगुणजुत्ता ण संदेहो ॥८॥
 जह कंचणं विसुद्धं धम्मइयं खडियलवणलेवेण ।
 तह जीवो वि विसुद्धं णाणविसलिलेण विमलेण ॥९॥
 णाणस्स णत्थि दोसो कुप्पुरिसाणं वि मंदबुद्धीणं ।
 जे णाणगव्विदा होऊणं विसएसु रज्जंति ॥१०॥
 णाणेण दंसणेण य तवेण चरिण सम्मसहिण ।
 होहदि परिणिव्वाणं जीवाण चरित्तसुद्धाणं ॥११॥
 सीलं रक्खंताणं दंसणसुद्धाण दिढचरित्ताणं ।
 अत्थि धुवं णिव्वाणं विसएसु विरत्तचित्ताणं ॥१२॥
 विसएसु मोहिदाणं कहियं मगं पि इट्ठदरिसीणं ।
 उम्मगं दरिसीणं णाणं पि णिरत्थयं तेसिं ॥१३॥
 कुमयकुसुदपसंसा जाणंता बहुविहाइं सत्थाइं ।
 शीलवदणाणरहिदा ण हु ते आराधया होंति ॥१४॥
 रूवसिरिगव्विदाणं जुव्वणलावण्णकंतिकलिदाणं ।
 सीलगुणवज्जिदाणं णिरत्थयं माणुसं जम्म ॥१५॥
 वायरणछं दवइसे सियववहारणायसत्थे सु ।
 वेदेऊण सुदेसु य तेसु सुयं उत्तमं शीलं ॥१६॥
 सीलगुणमंडिदाणं देवा भवियाण वल्लहा होंति ।
 सुदपारयपउरा णं दुस्सीला अप्पिला लोए ॥१७॥
 सव्वे वि य परिहीणा रूवणिरूवा वि पडिदसुवया वि ।
 सीलं जेसु सुसीलं सुजीविदं माणुसं तेसिं ॥१८॥

जीवदया दम सच्चं अचोरियं बंभचेरसंतोसे ।
 सम्मदंसण णाणं तओ य सीलस्स परिवारो ॥१९॥
 सीलं तवो विसुद्धं दंसणसुद्धी य णाणसुद्धी य ।
 सीलं विसयाण अरी सीलं मोक्खस्स सोवाणं ॥२०॥
 जह विसयलुद्ध विसदो तह थावरजंगमाण घोराणं ।
 सव्वेसिं पि विणासदि विसयविसं दारुणं होई ॥२१॥
 वारि एक्कम्मि य जम्मे मरिज्ज विसवेयणाहदो जीवो ।
 विसयविसपरिहया णं भमंति संसारकंतारे ॥२२॥
 णरएसु वेयणाओ तिरिक्खए माणवेसु दुक्खाइं ।
 देवेसु वि दोहगं लहंति विसयासिया जीवा ॥२३॥
 तुसधम्मंतबलेण य जह दव्वं ण हि णराण गच्छेदि ।
 तवसीलमंत कुसली खवंति विसयं विस व खलं ॥२४॥
 वट्टेसु य खंडेसु य भद्देसु य विसालेसु अंगेसु ।
 अंगेसु य पप्पेसु य सव्वेसु य उत्तमं सीलं ॥२५॥
 पुरिसेण वि सहियाए कुसमयमूढेहि विसयलोलेहिं ।
 संसार भमिदव्वं अरयघरट्टं व भूदेहिं ॥२६॥
 आदेहि कम्मगंठी जा बद्धा विसयरागरंगेहिं ।
 तं छिन्दन्ति कयत्था तवसंजमसीलयगुणेण ॥२७॥
 उदधी व रदणभरिदो तवविणयंसीलदाणरयणाणं ।
 सोहेंतो य ससीलो णिवाणमणुत्तरं पत्तो ॥२८॥
 सुणहाण गद्दहाण ण गोवसुमहिलाण दीसदे मोक्खो ।
 जे सोधंति चउत्थं पिच्छिज्जंता जणेहि सव्वेहिं ॥२९॥
 जइ विसयलोलएहिं णाणीहि हविज्ज साहिदो मोक्खो ।
 तो सो सच्चइपुत्तो दसपुव्वीओ वि किं गदो णरयं ॥३०॥
 जइ णाणेण विसोहो सीलेण विणा बुहेहिं णिदिट्ठो ।
 दसपुव्वियस्स भावो य ण किं पुणु णिम्मलो जादो ॥३१॥
 जाए विसयविरत्तो सो गमयदि णरयवेयणा पउरा ।
 ता लेहदि अरुहपयं भणियं जिणवड्ढमाणेण ॥३२॥

एवं बहुप्पयारं जिणेहि पच्चक्खणाणदरसीहिं ।
सीलेण य मोक्खपयं अक्खातीदं य लोयणाणेहिं ॥३३॥
सम्मत्तणाणदंसणतववीरियपंचयारमप्पाणं ।
जलणो वि पवणसहिदो डहंति पोरायणं कम्मं ॥३४॥
णिद्दुअट्ठकम्मा विसयविरत्ता जिदिंदिया धीरा ।
तवविणयसीलसहिदा सिद्धा सिद्धिं गदिं पत्ता ॥३५॥
लावण्यसीलकुसलो जम्ममहीरुहो जस्स सवणस्स ।
सो सीलो स महप्पा भमिज्ज गुणवित्थरं भविए ॥३६॥
णाणं ज्ञाणं जोगो दंसणसुद्धीय वीरियायत्तं ।
सम्मत्तदंसणेण य लहंति जिणसासणे बोहिं ॥३७॥
जिणवयणगहिदसारा विसयविरत्ता तवोधणा धीरा ।
सीलसलिलेण णहादा ते सिद्धालयसुहं जंति ॥३८॥
सव्वगुणखीणकम्मा सुहदुक्खविवज्जिदा मणविसुद्धा ।
पप्फोडियकम्मरया हवंति आराहणापयडा ॥३९॥
अरहंते सुहभत्ती सम्मत्तं दंसणेण सुविसुद्धं ।
सीलं विसयविरागो णाणं पुण केरिसं भणियं ॥४०॥